


社320
83



八旗通志初集卷之一百三十二

宗室王公列傳四

追封饒餘親王阿巴泰

孫貝子蘇布圖
貝子強度

安郡王岳樂

子安郡王馬爾渾
孫安郡王華玘



命與德格類台吉。寨桑古台吉。岳託台吉。統兵三千往征之。庚辰。乘夜疾行。明日平明。過羅地。渡遼河。縱兵急趨。有前鋒總兵戴音布者。率精銳五十人。先至厄爾格勒。知爲昂安貝勒部民。遂畧地而前。昂安攜妻子及二十餘人。引牛車而遁。戴音布引十餘騎往追。引弓射之。昂安從者乘發矢時。執小鎗迎刺戴音布。中其口。墮馬。創甚死焉。阿巴泰等引兵衝入。斬昂安及其子并從者。伏屍一處。盡獲其妻孥軍民畜產。又執鍾嫩貝勒子桑土台吉之妻及子而回。以功晉封貝勒。

天聰元年五月辛未。

太宗文皇帝聞明人於我所棄錦州。大凌河。小凌河。築城屯田。親往征之。留阿巴泰貝勒與杜度貝勒居守。二年五月。聞明兵棄錦州。遁往寧遠。阿巴泰貝勒與岳託貝勒。碩託貝勒。八旗固山額真。率兵三千。往畧明地。竝墮錦州城。

太宗送出征諸貝勒於十里外。授以方畧。阿巴泰貝勒與岳託貝勒。師至中途。聞顧特塔布囊部落。自察哈爾。逃至蒙古阿喇克綽忒部落舊地居住。遇歸降我國者。輒行截殺。遣八人往覘之。得實。

因遣使以其事聞。三年十月。

太宗親統大兵伐明。乙亥。大兵次老河。

太宗集諸貝勒大臣。授計分兵。

命阿巴泰貝勒。與阿濟格貝勒。率左翼四旗兵。及左翼

蒙古諸貝勒兵。從龍井關攻入。丁丑。前行。夜半

攻克龍井關。寅時。毀水關而入。明漢兒庄副將

易愛。洪山口參將王遵臣。聞礮聲。領兵來援。我

兵逆戰。敗之。易愛。王遵臣。并敵眾俱就戮。又擊

斬明三屯營哨卒。至漢兒庄城外。方欲招之降。

會大貝勒莽古爾泰。墨勒根代青貝勒多爾袞。

額爾克楚虎爾貝勒多鐸皆至。明副將協標官

李豐。率城內民薙髮出降。大軍遂入。乘城而營。

民間秋毫無犯。十一月丙申。

太宗自三河起營。行二十里。獲一漢人。訊以敵兵消息。

知大同宣府。二總鎮兵。見在北邊順義縣。於是

遣阿巴泰貝勒。與岳託貝勒。率二旗兵。及蒙古

二旗兵往勦。阿巴泰貝勒。與岳託貝勒。分兵前

進。擊敗大同滿總兵。宣府侯總兵。因敵兵速遁。

未得盡殲其眾。止獲馬千餘匹。駱駝百餘隻。順

義縣知縣率眾來降。辛丑。大兵起行。逼北京。

太宗營於城北土城關之東。兩翼兵營於東北。而東南隅有寧遠巡撫袁崇煥。錦州總兵祖大壽等。以兵來援。阿巴泰奉

命。同左翼大貝勒莽古爾泰。及阿濟格貝勒。墨勒根代青貝勒。多爾袞。額爾克楚虎爾貝勒。多鐸。豪格。貝勒。領白甲擺牙喇兵。及蒙古兵迎擊。

太宗駐蹕德勝門外。審視虛實。莽古爾泰等。率擺牙喇兵。及蒙古兵二千往。見寧遠巡撫袁崇煥。錦州總兵祖大壽。兵二萬。屯沙窩門外。莽古爾泰分兵爲三隊。令纛章京等。率擺牙喇兵前進。令阿

巴泰。與阿濟格。多爾袞。豪格。繼進。時敵於右偏伏兵甚衆。因約我軍入隘口。比入隘口。豪格趨右偏。敗其伏兵。追殺至城壕。餘三貝勒由正路入。擊敗敵兵。亦追殺至城壕。十二月辛酉。遣阿巴泰。貝勒。同薩哈廉。貝勒。往房山祭金太祖。世宗。壬申。復遣阿巴泰。及濟爾哈朗。阿濟格。杜度。薩哈廉。諸貝勒。總兵官楊古利。額駙等。率兵三千。往畧通州一帶。焚毀船隻。遂攻張家灣。克之。丁丑。與大貝勒代善等。率擺牙喇兵。及礮手共五百名。往視薊州。盡斬山海關援兵五千餘人。

八旗通志 卷一百三十一
四年春正月。大兵至永平。是夜前哨土魯什擒一人來獻。言有劉興祚者。自滿洲國逃出。從山海關與袁崇煥同來永平。

太宗遂遣阿巴泰。同濟爾哈朗貝勒。率官八員。兵五百名。星夜往捕之。癸丑黎明。阿巴泰同濟爾哈朗追及劉興祚。見興祚引兵趨山海關。阿巴泰馳圍其前。濟爾哈朗追躡其後。遂陣斬興祚。生擒其弟劉興賢以歸。旋攻克永平。丙戌。

太宗率大兵向山海關進發。戊子。阿巴泰與岳託。豪格。三貝勒。率副將孟喬芳。楊文魁。遊擊楊聲遠。及

兵四百人。自永平來見。庚子。

太宗駐蹕三屯營。阿巴泰貝勒奉

命率所屬擺牙喇。偕大海。白格。往城中分撥房舍。五年二月甲子。

太宗班師。

命阿巴泰貝勒。同濟爾哈朗貝勒。薩哈廉貝勒。偕文臣索尼。甯完我。喀木圖。率正白鑲紅正藍三旗將士。鎮守永平。三月壬子亥刻。有敵兵自樂亭。撫寧。來攻灤州城南門。不克而退。復攻城北隅。亦不克。天未明。俱渡河去。黎明。阿巴泰薩哈廉兩

貝勒自永平率三旗兵往援。辰刻次灤河岸。聞明兵退。乃還永平。是年初設六部。以阿巴泰管工部事。秋七月己亥。

太宗率諸貝勒將帥征明。庚子。大兵渡遼河。丁未。兩路兵抵大凌河。遂以是夜圍其城。戊申。

太宗下令言攻城恐士卒被傷。不若掘壕築牆以困之。彼兵若出。我則與戰。外援若至。我則迎擊。八旗主將分圍其城。仍各令大將策應。阿巴泰貝勒率擺牙喇兵策應。正黃旗固山額真冷格理圍北面之兵。是秋克大凌河。明總兵祖大壽降。乃縱令回錦

州爲內應。十月乙巳。奉

命與德格類貝勒。墨勒根代青貝勒。多爾袞。岳託貝勒。率梅勒額真八員。官四十員。統兵四千。偕祖大壽。及所屬兵三百五十名。作潰奔狀。滿洲兵亦著漢裝。欲以計取錦州。漏下二鼓。大凌河城內礮聲不絕。兵夜行。會天大霧。覲面不相識。兵皆失隊伍。因而收兵。及明而還。是夜錦州聞礮聲。以爲大凌河人得脫。分路來迎。復爲我兵所殺。七年六月。

太宗命諸貝勒大臣各抒所見。陳奏時事。阿巴泰貝勒

奏言。明人地利。蒙

天庇佑。我等已熟識之。不可遲延。其邊城之堅瑕。

聖上亦悉知之。宜選精兵襲其邊牆。則關門可得。

聖上軍於邊外。擇諸貝勒將帥分八路馳入。駐軍內地。

若獲可用之人。送至大營。恭候

諭旨。遣入內地。則可速得彼之消息矣。又思錦州無足
過慮。我兵既入。是天時已至。令祖大壽入山海
關。可與我兵相會合也。八月壬戌。與阿濟格貝
勒。薩哈廉貝勒。豪格貝勒等。率一等公楊古利。
總兵官吳內格。每固山一額真。每甲喇一額真。

統兵二千名。往畧明山海關一帶。九月庚寅。遣
剛林。苗碩渾。奏報俘獲人馬牛驢共四千二百
一十有三。八年五月丁未。隨

太宗率大兵。證明。七月入上方堡。由宣府攻畧朔州一
帶。定議四路兵俱於七月初八日入邊。八月甲
子。同阿濟格貝勒。超品公楊古利。率兵往取靈
邱縣王家莊。戊辰。遣人奏報攻拔靈邱縣。殺知
縣一員。守備一員。辛未。以所獲牲畜銀兩緞疋
衣服等物進獻。旋又攻克王家莊。閏八月庚寅
班師。崇德元年敘功。封爲饒餘貝勒。五月癸酉。

同武英郡王阿濟格等往征明。六月二十七日入邊。兩黃旗自巴顏德木地方入。兩白旗正藍旗自坤都地方入。兩紅旗鑲藍旗自大巴顏地方入。入邊之第八日。相會於延慶州。以明人先知我師期。遂皆收集入城。又我兵前番所過地方。已經殘破。故所獲無多。九月。遂直入長城。過保定府至安州。克十二城。敗敵五十六陣。俘獲人口牲畜十七萬九千八百二十。

勅諭嘉獎。賜馬二匹。又殺明遵化三屯營守備一員。山海關千總一員。百總四員。生擒百總一員。已巳

凱旋。

太宗親往迎之。是役攻克明國邊城。長驅而入。北京附近疆土。盡皆殘破。凡克城十二座。敗敵五十八陣。俘獲人畜十八萬。生擒總兵巢丕等。十二月辛未。

太宗將親統大軍往征朝鮮。

命阿巴泰駐噶海城。收集邊民防敵。二年二月。鄭親王濟爾哈朗。令壯尼大喇巴什希牙巴蘭轄。率擺牙喇五名。來會兵捉生。阿巴泰遣擺牙喇甲喇章京囊古馬克圖。噶巴喇。及噶海守臣尼堪。卦

爾察率擺牙喇百三十人駐守噶海。阿禮哈超哈十人共百四十人。由噶海起行。夜入明境。遂至錦州義州界。獲二步卒而還。未幾。

太宗諭阿巴泰曰。爾可攜隨戍之四旗擺牙喇還。後當另遣兵代之。鎮守噶海之噶布什賢。與鎮守開城之噶布什賢。可合兵為一。於大都爾鼻地方。不拘前後。相其有草處駐營。駐營之地。止許離都爾鼻一二十里。自噶海還時。爾可遣擺牙喇甲喇章京一員。以噶布什賢數目。造冊帶來。其應更代之噶布什賢。俟休息馬匹。然後更代。又當令鎮守噶海等官。勤飭農務。

不可因天氣寒冷。欲姑緩以俟和暖。必須早為耕植。噶布什賢章京沙爾虎達。可令單騎來盛京。三年二月丁酉。

太宗親征喀爾喀。

命阿巴泰留守

盛京。併監築遼陽都爾鼻城。五月癸酉。奉

命自盛京至遼河。修治大路。兩傍濬壕。中間增土高三尺。寬十丈。八家。及八旗。每牛衆出兵六十。及親附三順王下甲兵。皆赴工。阿巴泰與睿親王多爾袞董其役。九月癸未。同奉命大將軍睿親王

八旗通志 卷一百三十一
多爾袞等率左翼兵征明。十月奏報捷音。言臣等蒙

上天眷祐。

聖主威福。自董家口東二十里外。青山關西二里許。步登山岡。由無邊牆處進兵。九月二十八日。毀其邊牆而入。青山關山峻牆堅。問土人云。青山關有兵二百防守。聞右翼兵消息。已於九月二十五日往援。因乘其無備。不傷一人。獲其邊境。我兵毀牆而進。莫敢撓鋒。青山關董家口。青山營三處人民。棄城逃走。執俘獲人問之。言青山關

東二十里榆木嶺口。有步兵二百。與董家口兵亦以右翼兵入。聞往救援。問流賊消息。云在河南等處擄掠。今年大水。禾稼半收。祖大壽及其兵馬已調往西去矣。四年四月壬子凱旋。以所獲之物。按旗具冊以獻。

太宗賜阿巴泰馬二匹。銀五千兩。九月癸酉。同武英郡王阿濟格等。率官兵往畧明錦州寧遠。五年六月乙丑。同睿親王多爾袞等。率官兵一半。往代鄭親王濟爾哈朗等。於義州築城屯田。七月乙酉。遣筆帖式碩代等。賫奏至。言錦州城西禾稼。

兩日刈畢。刈禾時。敵人馬步兵由城西北隅出。鎗礮竝施。因遣擺牙喇兵兩隊。左翼阿禮哈超哈兵一隊。共分三隊。令其從旁衝擊。我兵方進。敵兵卽潰。追至城壕掩殺之。又遣擺牙喇兵伏松山大路。遇祖總兵遣二人賫書赴寧遠。擒獲之。錦州城蒙古騎卒五人。步兵一人來歸。又克錦州城西臺九座。小凌河西岸臺二座。共克臺十一座。獲人四十名。七月己酉。遣詹代安泰馬克占等報捷。言右翼阿巴泰與安平貝勒等。率兵伏寧遠路。遇敵人自關內運米千石至錦州。

殺其步卒三百九十人。獲駝二隻。馬十七匹。騾九十四頭。牛二百二十七頭。驢五十七頭。共三百九十七匹頭。八月乙亥。睿親王多爾袞。肅親王豪格。安平貝勒杜度。饒餘貝勒阿巴泰等。報捷至。奏言七月二十九日。右翼多羅安平貝勒固山貝子公等。及固山額真等。率噶布什賢擺牙喇全軍。及阿禮哈超哈兵一半。前往錦州。遇敵兵出城刈草。追斬八十六人。獲馬騾牛驢共一十三匹頭。和碩睿親王。和碩肅親王。遣左翼噶布什賢兵擺牙喇兵馳畧。獲米十五車。先被

八旗通志 卷一百三十二
安平貝勒陣斬者。敵人將取其尸。又遇我兵盡
殲之。又八月初六日。遣前哨章京格巴庫。率甲
士十人。往探大凌河海口。獲船二隻。斬三十五
人。又敵人夜入義州。於我兵屯田所。殺死滿洲
三人。滿洲家人。漢人。八十九名。敵人當夜卽回。
我兵於次日追及後隊。斬之。九月辛卯。遣羅實
稽賽等。報捷。言九月每牛彙下。止留阿禮哈超
哈甲士二人守營。其餘官軍。王貝勒等率往杏
山城北山頭。見敵人自杏山城出。兵馬無多。我
兵方誘敵時。松山一帶哨卒來報云。松山騎兵

已出。王貝勒等率兵馳至松山。遣擺牙喇章京
率兵擊敗之。及還。敵復以馬步兵來襲。相去五
里。王貝勒等駐立。縱阿禮哈超哈擺牙喇超哈
官兵擊敗之。探卒來報松山兵復出。又令官兵
擊敗之。敵人遂遁。共擊敗總督一員。總兵七員。
士卒五萬。獲馬一百二十匹。甲五百七十副。癸
巳。同睿親王多爾袞等。遣恩國泰等報捷至。言
十一日聞洪承疇率劉吳王陳四總兵。及內外
馬步兵四萬。至杏山。王貝勒等率阿禮哈超哈
兵一半。並擺牙喇全軍前進。見敵人馬步兵於

杏山城外近壕下營。時敵人馬兵先出誘戰。王貝勒等會商。令阿禮哈超哈兵暫止。發擺牙喇官兵擊敵馬兵。追至城壕掩殺之。獲馬七十匹。十二月奉

命同睿親王多爾袞。肅親王豪格。安平貝勒杜度。率官兵一半。往代鄭親王濟爾哈朗等圍困錦州。六年六月庚午。遣轄雅賴。吉賽。漢褚翰等。奏捷。言關內援兵出松山來戰。我滿漢蒙古兵兩翼會合。追殺五里。直抵步隊。獲馬五百七十匹。七年四月。同鄭親王濟爾哈朗等。攻克杏山。甲子。遣

轄占代。誇代。達奇等。以克杏山捷音至。奏言。所奉

勅諭。卽傳入杏山城內。招其降。不從。復送還

勅諭。臣等遂於二十一日黎明。移礮於城北面。先攻取

其近城之臺。二十二日。卽於臺前列紅衣礮擊毀城垣。約二十五丈餘。我兵將欲登城。城上危急。衆官始開門。親至營中。叩首歸順。臣等遂令官兵入城。立於城上。仍令我兵守門。其投降官軍。及人畜等物數目。俟察明再奏。丙寅。以杏山投降官民。及所獲諸物數目具疏。遣邦紐等賚

八旗通志 卷一百三十三
至。計獲男子二千五百七十六人。婦女幼小四千二百六十二口。駝二隻。馬二十二匹。牛五頭。騾七頭。米穀一百四十四石。甲二千七百四十六副。紅衣礮鳥鎗共八百六十有三。十月。

特授爲奉命大將軍。同內大臣圖爾格等帥師。征明八年五月癸卯。遣學士額色黑。甲喇章京穆成格。穆福。轄索泰等。齎疏奏克城。敗敵及俘獲數目。言臣等蒙

上天眷佑。

聖主德威。將兗州府魯王。及樂陵。陽信。東原。安邱。滋陽。

諸王。共一親王。五郡王。及管理府事宗室等官。殆幾千人。盡皆屠戮。攻克三府。十八州。六十七縣。共八十八城。歸順者六城。共克九十四城。擊敗敵兵三十九處。獲金一萬二千二百五十兩。銀二百二十萬五千二百七十七兩。珍珠四千四百四十兩。各色緞共五萬二千二百三十疋。緞衣三萬三千七百二十領。皮衣一百一十領。貂皮一百二十張。狐皮七十六張。豹皮一百七十張。虎皮一百四十張。整角六百三十。角面五百三十副。俘獲人三十六萬九千餘口。駝五十

八旗通志 卷一百三十一
隻馬騾六萬四千四百六十四匹頭。牛十三萬
二百二十頭。驢二十五萬三千四百頭。羊十萬
三千二百隻。共計俘獲人畜凡九十二萬三百
一十有四。此外尚有發窖所得銀兩。剖爲三分。
以一分給賞。其衆兵私獲財物。未曾計數。謹此
奏聞。六月癸酉。班師還。甲戌。論功。

賜銀一萬兩。順治元年。晉封爲多羅饒餘郡王。二年正
月丁酉。奉

命爲總統。率官兵往山東代肅親王豪格。征勦土賊。二
月甲戌。奏捷言。二月初三日。聞南兵渡河。圍徐

州沛縣李家樓。隨遣固山額真準塔等。領兵星
夜前往。賊馬步兵二千有餘。屯駐徐州十五里
外。我兵衝擊賊營。賊兵赴河死者無算。擒斬逆
渠六人。安撫百姓。秋毫無犯。獲人口牛馬甚多。
四年薨。

賜祭葬如典禮。立碑墓道。文曰。爾阿巴泰。乃

太祖高皇帝側室子也。以行間著績。於崇德元年。封爾
爲饒餘貝勒。後圍明錦州。復能宣力。及統兵畧山東
郡邑。又多克獲。以屢奏軍功。於順治元年。晉爾爲多
羅饒餘郡王。不幸遽爾奄逝。特諭所司勒碑墓所用

申哀悼。子岳樂。博洛。博和託。孫章泰。俱自有傳。順治六年十月。封阿巴泰孫蘇布圖。強度。俱爲固山貝子。蘇布圖以從征薨於軍。諡悼愍。八年十一月。強度薨。諡介潔。蘇布圖。強度。皆阿巴泰子尚建之子。康熙元年三月。以阿巴泰子岳樂。晉封親王。因追封阿巴泰爲親王。今從追封爵稱焉。多羅安郡王岳樂。饒餘親王阿巴泰子。初封鎮國公。順治三年正月。隨肅親王豪格。征四川流寇有功。五年七月。奉

命帥師勦天津土寇。滅之。十一月。率兵駐防大同。六年

十月。封多羅貝勒。八年二月。襲封郡王。賜王號曰安。九年二月。管工部尚書事。十月。任議政。十年八月。以喀爾喀部落。相約舉兵作亂。

命王爲宣武大將軍。統領官兵戍防歸化城。十二年八月。任宗人府宗正。十四年十一月。

世祖章皇帝。以王性行端良。蒞事敬慎。晉封親王。仍號安。康熙九年三月。奉

命爲監修玉牒總裁官。十二年冬。逆藩吳三桂反。十三年三月。逆藩耿精忠亦反。九月。兩廣總督金光祖。疏報廣西提督馬雄。左江鎮總兵官郭義。竝

叛降於吳逆。廣西全省變動。奉

命為定遠平寇大將軍。由江西往討之。十月丙申。帥師

出

京。

聖祖仁皇帝。出西長安門親送之。十一月奉

命赴江西酌量調度軍機。十二月疏報。吳逆下偽總兵

官張泰。踞守安福縣。率兵進剿。殺賊五千餘。恢

復縣城。又恢復都昌縣。疏通河道。招撫康山餘

賊。十四年正月奉

命帥師取長沙。王疏奏。江西形勢。為廣東咽喉。江南湖

廣要衝。今三十餘城。皆賊兵盤踞。且醴陵逆賊

造設木城。增偽總兵十餘人。兵七萬。裸裸三千。

堅守萍鄉諸處。臣若撤撫饒都昌防兵。進抵長

沙。則諸處復為賊有。不撤則兵勢單弱。不能長

驅。且廣東諸路。恐亦多阻。臣欲先平江西賊寇。

無却顧之憂。然後分防險要。帥師前往。

詔如所請。二月疏報。克復上高。新昌。二縣。陣斬偽總兵

朱一典。謝以泰。共殺賊一萬五千餘。生擒偽副

將守備等官。又招撫江西偽官二十餘員。兵三

千六百餘名。三月疏報。二月十四日。敗賊於撫

州城南四十里唐埠地方。三月初二日。復敗之。於七里岡。四月疏報。招撫江西奉新都昌冷口。南湖西湖等處。僞官九十一員。兵一萬九千八百餘名。又招撫銅鼓營。強山。東鄉。餘千。奉新等處。僞官九十七員。兵三萬三千二百餘名。又報本月初四日。敗耿逆僞都督於饒州府萬年縣之石頭街。斬賊五千餘級。生擒三百名。又統兵攻東鄉縣。四面立梯。仍移檄諭僞副將林振。及僞官等五十六員。賊衆因領其十一營一萬一千餘衆。繳僞印。僞劄。投誠。遂復東鄉縣。五月疏

報臣等進取建昌。抵長興。遇賊將邵連登。兵八萬餘。水陸迎敵。偕定南將軍希爾根進擊。斬獲甚衆。遂復建昌城。又恢復萬年。安仁。二縣。屢敗賊衆於鸞石嶺。白水山口等處。破其巢穴。閏五月。饒州陷。奉

命回南昌。分兵調度。收復饒州。庚戌疏報。副都統朱拉禪。敗賊於武寧縣。都統覺羅晝特。克新城縣。生擒僞遊擊許定國。江寧將軍額楚。至弋陽。敗賊將蔣洪德。兵五萬。又敗僞總兵柯昇。援兵二萬餘。進抵廣信。賊已遁去。因復其城。六月疏報。定

南將軍希爾根進取饒州。敗賊於餘干。抵饒州。賊先一夕遁去。饒州平。七月疏報。招撫江西泰和龍泉永興廬陵等縣。并湖廣茶陵永寧等州縣。僞官二百七十餘員。賊兵及家口六萬五千六百餘名。又遣定南將軍希爾根於碣碑浦景德鎮地方。屢敗賊衆。斬僞副將叅將以下十餘員。賊兵八千餘級。生擒四百餘名。恢復浮梁樂平二縣。又遣侍郎舒恕總兵官許貞等率兵敗賊於宜黃。恢復宜黃崇仁樂安三縣。九月疏報。官兵抵靖安縣。破僞總兵桂芳等。賊遁。遂復靖

安。九月奉

諭旨量留官兵固守江西。乘冬月速取長沙。十一月疏奏。逆賊吳三桂聞臣進取長沙。必固守要害。非綠旗兵無以搜其險阻。非紅衣礮不能破其營壘。提督趙國祚久任行間。熟練火器。兼統旗兵三千。屯墾都督陳平所轄兵二千。乞俱令隨臣進討。其廣東送來紅衣礮甚重。兼路險難致。惟西洋礮輕利便於運動。乞發二十具爲攻剿之用。得

旨。剿滅逆賊。平定湖南。俱賴王練習宿將及精兵火器

俱不可闕。提督趙國祚。都督陳平。并所屬官兵。悉依王所請。南懷仁所造火礮。著官兵照數送至江西。轉運王軍前。王不必待礮始行。亟由吉安。或袁州進發。甲辰疏報。勦殺江西浮梁。貴溪等縣賊眾。恢復城池。招撫偽官張輔聖等二百七十餘員。兵三千三百七十名。十一月疏報。招撫偽官六十七員。兵丁家口四千四百餘名。壬戌疏奏。偽總兵張存。遣使來言。閩逆軍餉匱乏。恣意剝削。軍士逃亡。百姓怨讟。張存所屬兵八千屯於順昌。不聽耿逆調遣。又偽總兵羅元生。統兵固守其地。

邵武總兵彭世勳。雖降逆而按兵不動。此皆耿逆之內患也。若大兵自江西進閩。伊等即為內應。第臣今尅期往赴長沙。伏乞

睿鑒詳度。無失事機。尋奉

聖祖諭。招徠逆賊。進克福建。令大將軍簡親王。副將軍希爾根。將軍額楚。總督董衛國等。相機以行。至於進攻長沙。勦滅吳逆。惟王是賴。但恐逆賊覘知我師進取長沙。固守袁吉。阻我兵行。今或兵分數道。在王必有定見。其悉心籌畫萬全。務速之。十五年二月。江西總督董衛國疏報。王統大兵進勦逆賊。抵萍鄉。

縣相視地方形勢。分兵四隊。大敗賊衆。破十二寨。斬首萬餘級。僞將軍夏國相棄印走。遂復萍鄉。十六年二月疏報。敗僞總兵解先聲於瀏陽縣。斬首千餘級。生擒僞遊擊守備等九名。十月疏報。馬棚逆賊擾瀏陽縣。遣副都統阿晉泰率滿漢兵大敗之。擒斬無算。十一月奉

命乘逆賊震動之時。速分兵摧破楚逆。取湘潭諸處。十七年正月疏報。官兵敗賊於平江。恢復縣城。三月疏報。招撫僞總兵揭玉慶等一百二十三員。兵丁一千餘名。進剿馬棚賊於七家洞。擒斬甚

王李衆。又招撫僞總兵朱永升等。閏三月疏報。吳三

桂僞親軍水師右翼將軍林興珠率僞官楊廷

言。自湘潭來降。十八年二月疏報。岳州已經恢

復。長沙逆賊震恐。於正月二十九日棄城潛遁。

臣已入城安撫人民。又報前鋒叅領沙納哈率

兵至湘潭。賊望風驚遁。恢復縣城。三月王親統

大兵進取衡州。寶慶等處。七月疏報。招撫僞知

府金世正等二百八十六員。七月疏報。敗逆賊

僞楊總兵於寶慶府巖溪地方。斬首七百餘級。

獲船四十餘艘。八月疏報。臣等率師抵紫陽河。

八旗通志 卷一百三十二
適賊於對岸結營。遣建義將軍侯林興珠提督趙國祚副將尼滿渡河進擊。前後夾攻。賊潰棄營遁。追殺二百餘人。生擒偽都司一名。賊首吳國貴盤踞武岡州。率偽將軍胡國柱等賊二萬。逆戰隘口。復遣建義將軍侯林興珠提督趙國祚率兵奮擊。大破之。吳國貴中火礮死。餘賊棄武岡遁。遂復武岡城及楓木嶺。十一月疏報。偽知縣周冠等率兵丁四百二十三名投誠。乙卯。聖祖以諸處漸定。

命王率每佐領八人還

京。以固山貝子章泰爲定遠平寇大將軍。代總軍務。十二月。獲明僞太子朱慈燦。攜至

大京師。十九年正月。

聖祖特諭褒德賞功。國家之令典。安內攘外。社稷之崇勲。王連年以來。遠蒞巖疆。親經百戰。櫛風沐雨。歷暑逾寒。競揚貔虎之雄。克清梟獍之孽。湖湘諸處。已見蕩平。滇黔餘氛。俱成坐困。更體朕軫念窮荒之心。廣示招徠。深加撫恤。王師所至。遐邇來歸。捷奏屢宣。中外稱慶。朕旣嘉碩畫。益篤親親。爰命班師。副朕懷想。頃者聞王已抵武昌。奏凱可期。特遣使臣慰勞。兼賜

駱駝良馬。以示優眷。王卽按程以來。朕將計日以待。
示京。是歲還。二十八年二月薨。賜賚甚優。二十九年十二月。因更。命掌宗人府事。二十八年二月薨。賜祭葬立碑。諡曰和。碑文云。朕纂承洪緒。篤念本支。睦族展親。務從優渥。矧維城舊德。宣力邦家。生受祉於天潢。歿垂光於貞石。固其宜也。爾和碩安親王。乃多羅饒餘郡王之子。系出大千米。太祖高皇帝。為國懿親。早膺公爵。佐軍巴蜀。作鎮雲中。

旋授多羅貝勒。紹封郡王。掌理冬官。列於議政。嗣命以大將軍屯歸化城。擢司宗正。屢經任使。著有勤勞。世祖章皇帝乃加恩眷。晉封親王。禮遇隆厚。洎朕命將討逆。勅為定遠平寇大將軍。出師豫章。王仰承指授。宣厲國威。逮乎旋旆歸朝。雍容圭紱。方期究享遐齡。何意耄耄未臻。溘焉凋謝。永維終始。殊愴朕心。用是循考彝章。易名賜葬。嗚呼。華表方新。爰備飭終之典。松楸已列。彌增眷舊之懷。勒此豐碑。光昭奕世云。子馬爾渾。初封世子。康熙二十九年二月。襲封多羅安郡王。三十九年十二月。緣事。併追降岳樂。

羅安郡王。三十九年十二月。緣事。併追降岳樂。

為郡王。四十年正月。以馬爾渾。掌宗人府事。四十五年二月。為纂修

玉牒總裁官。四十八年十一月薨。

賜諡曰愨。造墳立碑。碑文稱其敬慎居心。謙和行已。嗣

藩封之顯爵。領宗正之崇班云。四十九年二月。

宣以子華玘襲安郡王爵。五十八年九月戊戌薨。

賜祭葬立碑如例。諡曰節。

八旗通志初集卷之一百三十三

宗室王公列傳五

敬謹親王尼堪

父貝勒褚燕 子敬謹親王 尼思哈 輔國公蘭布

承澤親王碩塞

子莊親王博果鐸 輔國將軍恩克布 弟襄親王博穆

博和爾 鎮國公高塞

裕親王福全

恭親王常寧

純親王隆禧

恒親王允祺

淳親王允祐

愉郡王允禩

鑲紅旗和碩敬謹親王尼堪。

太祖高皇帝之孫也。父褚燕為

太祖長子。戊戌年春正月。與巴雅喇台吉及噶蓋扎爾
固齊費英東扎爾固齊統兵一千征安褚拉庫
路。星馳而往。取屯寨二十餘。將所屬人民盡招
徠之。於是

賜名洪巴圖魯。封為貝勒。丁未年春正月。瓦爾喀蜚悠
城人苦烏喇國布占泰貝勒之虐。乞移家來附。
褚燕奉

命同舒爾哈齊貝勒代善貝勒率兵三千往徙之。乘夜

八旗通志 卷一百三十三
陰晦而行。見大燻。之上有光。衆以爲異。捫視無有。復樹之。光如初。舒爾哈齊貝勒疑爲凶兆。欲回兵。洪巴圖魯貝勒與代善貝勒曰。或凶或吉。兆已定。吾等何所見而回兵耶。遂決意進兵。至蜚悠城。盡收環城屯寨。凡五百戶。令扈爾漢轄。率兵三百衛之。先行。烏喇國布占泰貝勒聞之。發兵萬人。邀諸路。扈爾漢轄結寨山巔。與敵相持。次日。洪巴圖魯貝勒與弟代善貝勒等至。策馬奮怒曰。

皇父每有征伐。無不破降其衆。今雖未親歷行間。有我等在此。爾等勿憂。昔布占泰來侵我國之日。被我國擒而縛之。豢養多時。宥其死以歸。俾主其國。爲時不久。其人如故。曾從我手而釋。豈天釋之耶。爾等勿謂彼兵爲多。我國荷

天眷仗

皇父威名夙著。破敵兵必也。衆軍士皆奮。願効死。遂率衆渡河。與代善貝勒各領兵五百。分二路緣山奮擊。烏喇兵遂敗走。時天氣陰凍。被傷敵兵棄甲逃者。僵仆甚衆。及班師。

太祖嘉其勇。改賜洪巴圖魯號爲阿爾哈圖土門。戊申

年春三月。與阿敏台吉率兵五千征烏喇國。圍其宜罕阿麟城克之。斬千人。獲甲三百。俘其衆以歸。時烏喇國布占泰貝勒與蒙古科爾沁翁阿岱貝勒合兵出烏喇城二十里。駐兵遙望。知非我軍之敵。遂不戰而遁。乙卯年秋。閏八月薨。年三十六。長子杜度封安平貝勒。自有傳。尼堪其第三子也。早歲卽立功戎行。征多羅忒董夔俱在行間。天聰九年五月。征明。尼堪隨額爾克楚虎爾貝勒多鐸率師入明寧遠錦州地界立營。遙制寧遠錦州援兵。尋晉封固山貝子。崇德

元年十二月。同戶部承政馬福塔率擺牙喇兵千人。隨豫親王多鐸往征朝鮮。圍其國王所都王京。朝鮮王棄國遁去。追至四十里南漢山城。復還繞立寨圍之。朝鮮國外道兵聞其王被圍。有巡撫一員。領兵一萬八千來援。分立兩營。尼堪率兵迎敵。大敗之。又有一副將領兵五千來援。復擊敗之。二年四月。任議政大臣。四年三月。同武英郡王阿濟格。貝子羅託等。征明。率四旗擺牙喇兵環守塔山連山。七年三月。隨鄭親王濟爾哈朗。駐劄塔山。是年克錦州。九月。尼堪率

官兵往代公博和託吞齊哈等駐防錦州。順治元年四月。隨睿王多爾袞進山海關。破流賊。復隨英親王阿濟格追賊至慶都縣。擊敗之。十月。晉封多羅貝勒。隨定國大將軍豫親王多鐸。統領官兵南征。十二月。破流賊入潼關。二年正月。師距潼關二十里立營。有賊將劉方亮領兵千餘來窺我營。燾章京圖賴等率兵擊之。尼堪復助兵奮擊。遂大敗之。俘斬甚多。賊又以騎兵三百橫衝我師。尼堪同懷順王耿仲明。固山貝子尙善擊敗之。三月。分兵三路趨歸德。定河南。四

月。進征南京。

世祖章皇帝以王貝勒等破流寇平陝西。安撫河南。復進征南京。勤勞日久。各加

恩賜。尼堪賜弓一張。五月。大兵克南京。僞福王朱由松。

潛遁太平。尼堪同昂邦章京圖賴等率官兵追之。僞福王走蕪湖。復率兵趨擊。僞福王登舟渡江。因據江口。截其去路。僞靖國公黃得功逆戰。擊敗之。敵兵皆墮水。盡奪其舟。得功中流矢死。僞總兵田雄等縛福王及其妃來獻。十總兵併部衆俱降。獲金銀綉緞寶玉貂皮等物甚多。又

用紅衣礮攻江陰縣克之。十月。

賜金二百兩。銀一萬五千兩。漆鞍馬一匹。空馬二匹。三年正月。隨靖遠大將軍肅親王豪格統官兵征四川。破流賊八大王張獻忠。四年八月。同貝子滿達海。固山額真杜雷等。分兵進勦遵義。夔州。茂州。榮昌。隆昌。富順。內江。資陽等處。斬僞王及巡撫道官總兵副將叅將遊擊都司守備一千餘員。兵丁無算。獲馬騾一萬二千四百餘。尼堪又獨領兵擊敗賊渠賀珍兵三次。安定漢中府民。川寇悉平。五年正月。凱旋。九月。晉封多羅敬

謹郡王。統領官兵勦天津土寇滅之。十二月。大同總兵姜瓖叛。六年正月。王奉

命爲定西大將軍。率官兵平太原。三月。王遣固山額真庫祿克達爾漢阿賴等。屢敗賊寇。斬僞巡撫姜輝。僞叅將羅映壇。獻印劄。率所部四百人降。是月。晉封和碩敬謹親王。四月。奉

命由左衛往圍大同。八月。僞總兵楊振威遣僞守備劉寶至軍前。言我等原係良民。爲逆寇姜瓖迫脇而反。大兵來圍大同。卽欲斬逆瓖歸順。奈力不及。今兵民饑餓。死亡殆盡。餘兵無幾。我等問計

八旗通志 卷一百三十三
於各官。裴季中等二十三人。與我等合謀。約斬姜瓖歸順。許之。振威等遂斬姜瓖。并其兄姜琳。弟有光。首級來獻。王率大兵入大同城。安撫民人。事平還京。尋緣事降爵爲多羅郡王。八年三月。管理禮部事務。尋管宗人府。五月。奉

特恩。仍封爲和碩敬謹親王。時僞桂王未平。九年七月。命王爲定遠大將軍。統官兵往征湖南貴州。

賜御服佩刀鞍馬等物。給與

勅書。言張獻忠餘孽孫可望等逆賊。侵擾湖南。陷民水火。不得不遣兵致討。特命王充定遠大將軍。統率大

兵征勦。王膺茲命。凡事與諸將同心協謀而行。毋謂自知。不聽人言。毋謂兵強。輕視逆寇。仍嚴偵探。毋致疎虞。抗拒不順者戮之。傾心歸順者撫之。總以安民爲首務。嚴禁兵將。申明紀律。凡歸順及恢復地方軍民。不得肆行殺掠。體朕好生至意。其陷賊文武官吏。自拔來歸。俱免罪酌用。有功者仍加敘錄。勦除逆賊。平定貴州。復擇善地屯劄。馳使奏聞。須候旨到。行間將領功績及重罪。俱察實紀明彙奏。各官有犯小過者。當卽處分。至於十人長分得撥什庫以下。無論大小罪過。俱與諸將商酌。徑行處分。王受茲重任。宜殫

八旗通志 卷一百三十三
忠竭力。早奏蕩平。是月。敬謹親王尼堪率師出京。

世祖親送至南苑。八月。

勅諭定遠大將軍和碩敬謹親王尼堪曰。聞賊入廣西。於七月初四日攻陷桂林府。定南王孔有德自盡。嚮命王勦滅湖南賊寇。平定貴州。今毋往貴州。仍從湖南進取寶慶。其西安府調發滿洲兵將。及提督總兵柯永盛官軍。留於寶慶。王領大兵入廣西。相機搜勦賊孽。其餘一應事宜。俱照前勅遵行。十一月。師抵湘潭縣。賊首偽將軍馬進忠等。領馬步兵已遁還。

寶慶府。王與衆將商議。將疲弱馬匹。撥梅勒章京二員。又每固山章京二員。每牛录甲兵四名。留後喂養。遂率官兵自湘潭向衡州府進發。去衡山縣三十里。前鋒遇賊哨卒。追至衡山縣。擊敗偽軍門一員。偽副將五員。馬步賊兵一千八百名。卽於是夜兼程前進。天未明抵衡州。及明。王率貝勒貝子公固山額真等向前。正列陣間。賊兵卽至。王指授頭隊兵擊賊。我兵各依所對之處衝入。賊兵大敗。追殺二十餘里。斬獲甚多。得象四隻。馬八百二十餘匹。殺敗賊兵四萬餘。

方頭隊兵擊賊時。我二陣兵正列陣間。忽見兩邊樹林內賊兵齊出。又衡州城內賊來甚衆。王云。我兵凡攻戰之處。俱直入擊賊。我爲宗室。若不斬除逆寇。何面目歸乎。於是奮勇直入擊賊。賊環繞圍之。王身率衆轄。橫豎衝擊。矢盡。拔刀力戰。遂歿於陣。年四十三。十年十月。靈櫬自湖南回。

京。

世祖命和碩親王以下。二品官以上。出郭十里迎。既至。世祖欲親臨其喪。諸王大臣力諫乃止。卹典加厚。

賜諡曰莊。十二月。以王次子尼思哈襲封敬謹親王。十

七年十一月薨。諡曰悼。乃封敬謹莊親王尼堪長子蘭布爲多羅貝勒。十八年六月。以蘭布父莊親王尼堪陣亡可憫。封蘭布爲敬謹郡王。康熙六年二月。蘭布告伊父亡後。伊弟尼思哈襲封親王爵。伊弟亡後。無故降等襲封。因晉封蘭布仍爲和碩敬謹親王。七年十月。緣事降爲輔國公。十二年十二月。逆藩吳三桂反。十三年六月。蘭布隨安遠靖寇大將軍多羅貝勒尙善率兵往湖廣岳州征之。

聖祖仁皇帝欽賜甲冑鞍馬腰刀。十七年二月卒於軍。
鑲紅旗和碩承澤親王碩塞。

太宗文皇帝子。順治元年十月封多羅承澤郡王。隨定
國大將軍豫親王多鐸南征。破流賊。平陝西。安
撫河南。二年往江南。征偽福王。破淮揚。直抵南
京。四月。

朝廷以王貝勒等在軍前勤勞日久。各加

恩賜。王賜團龍紗衣一襲。五月渡江。下江寧。擒偽福王
朱由松。自出京前後戰敗。水陸馬步敵兵一百
五十餘陣。江南浙江等處悉平。招撫文武官二

百四十四員。馬步兵三十一萬七千七百名。十
月凱旋。

賜王金二千兩。銀二萬兩。玲瓏鞍馬一匹。空馬四匹。三
年五月。以蘇尼忒部落騰機思。騰機忒。吳班代。
多爾機思哈。蟒悟思。額爾密克。石達等。各率所
部叛奔喀爾喀。

勅諭集外藩諸蒙古兵於克魯倫河。以和碩德豫親王
多鐸為揚威大將軍往勦。

命王同行。叅贊軍務。至聞騰機思在滾噶樓台地方。卽
同德豫親王疾追。凡兩日三夜及之。大敗其衆。

俘獲騰機思部落兵弁及生畜無算。喀爾喀部王同土謝圖汗兵迎戰於扎卽布喇格地方。王親率衆列陣大破之。次日碩羅汗迎戰復率衆敗之。五年七月奉

命統官兵勦天津土寇殲之。十一月以喀爾喀部落二楚虎爾行獵向我邊界。王奉

命統兵駐防大同。是冬大同總兵姜瓖據城叛。六年正月賊黨劉遷攻代州據其外關。章京愛松古遊擊高國勝併蒙古兵三百俱被困。王率兵往援。豎梯攻城大破之。斬賊渠郭芳遷圍解。又於德

勝路遇賊援兵七千距我兵三里許。結兩營拒敵。王親督戰敗之。八年閏二月。

世祖章皇帝以王係

太祖之孫兼軍功懋著。晉封和碩承澤親王。八年三月命王管理兵部事。十月任議政。十二年十二月薨。年二

十七。謚曰裕。以子博果鐸襲爵。改封號曰莊。康

熙五年正月封博果鐸弟恩克布爲三等輔國將軍。二十年二月恩克布卒。謚溫僖。雍正元年

莊親王博果鐸薨。謚定靖。碩塞弟博穆博和爾。順治十二年二月封和碩襄親王。十三年七月

八旗通志 卷一百三十三
薨年十六。於定例外加祭一次。建造墳祠。康熙十年五月。諡曰昭。弟高塞。順治九年九月。封輔國公。康熙八年九月。晉封鎮國公。九年卒。賜祭葬如典禮。諡愨厚。

鑲白旗和碩裕親王福全。

世祖章皇帝長子。

聖祖仁皇帝之兄也。康熙六年二月。封和碩裕親王。二十九年。厄魯特噶爾丹叛。深入烏朱穆秦地。王奉

命爲撫遠大將軍。率師往勦。八月。聞噶爾丹屯於烏闌

布通。卽統大兵鼓行而進。遇賊前隊。發鎗礮擊之。至山下。見厄魯特於林內。隔河岸相拒。橫卧駱駝以爲障蔽。大兵進擊。自未至戌。左翼兵由山腰捲入。大敗之。斬殺甚多。乘勝進勦。噶爾丹迫於追襲。據險堅拒。以誓書乞和。繼使人賫奏章至。王遣人馳奏。

聖祖仁皇帝從之。令仍率大兵駐彼。探噶爾丹出邊遠去實音。未幾。王以噶爾丹遁已月餘。遂率大兵內徙哈嗎爾嶺。部臣以王班師未經奉

旨。議罪。擬革王爵。

聖祖以此舉已擊敗厄魯特兵。諸王大臣概從寬免議。三十五年復從

聖祖征勦厄魯特噶爾丹。四十二年十一月薨。遣官致祭。如鄭親王例。於常祭二次外。加祭一次。造墳立碑。諡曰憲。

聖祖御製碑文云。國家景運。龐洪本支。百世用惇。秩敘懋建。屏藩矧茲。同氣之最親。加以懿行之茂著。恩無間於終始。禮務盡夫榮哀。紀述生平。倍增愾歎。惟王為

皇考世祖章皇帝之長子。朕之親兄也。胄既屬尊。齒復居長。而秉性寬和。持身謙牧。虛受之量。雖疎賤不遺。矜慎之衷。雖細微必飭。而其大者。則在因心展孝。曲盡

慈寧色養之誠。視國如家。克敦夙夜奉公之義。入而預聞大政。出而翊贊戎機。佐致昇平。共享清晏。豈期偶恙。遽遘鞠凶。當王之初疾也。嘗遣醫審藥。躬親再三。王自謂漸瘳。諄辭遜謝。及朕時巡塞上。哀訃忽聞。遂觸冒炎蒸。倍道遄返。輟朝臨奠。製誄抒懷。歷喪禮之告竣。常涕泗之橫集。顧瞻華屋。杳隔春暉。歲月不淹。頓成陳迹。能不悲夫。迄今追維往事。溯自髫齡。或同

侍寢門。或偕游禁苑。或叅稽圖史。或陪扈鑾輿。朕日篤家人昆弟之歡。而王則益修臣職。惟謹四十餘年。曾無失德。天懷樂善。何日忘之。經曰。高而不危。所以長守貴也。滿而不溢。所以長守富也。王服習斯訓。美備厥躬。按法旌行。予諡曰憲。洵無忝矣。茲王之寢園。在黃華山麓。川回巖抱。旣固且完。朕親相度。廼襄大事。嗣子保泰。命紹舊封。式纘王緒。於戲。惟王克忠克孝之節。允樹爲臣爲子之型。王之休德。朕褒揚之。王之後嗣。朕佑庇之。爰据實摛文。勒諸貞石。用垂令聞於不朽。俾後之覽者。知所景仰焉。

正藍旗和碩恭親王常寧。

世祖章皇帝子。

聖祖仁皇帝之弟也。康熙十年正月。冊封和碩恭親王。二十九年七月。奉

命爲安北大將軍。與兄撫遠大將軍裕親王福全。並出擊厄魯特。噶爾丹於烏闌布通。大敗賊衆。三十五年二月。復與兄福全。從

聖祖仁皇帝征勦厄魯特。四十二年六月乙亥薨。

聖祖遣官致祭。爲之造墳立碑。以紀功德。碑文云。國家因親錫寵。固莫重於宗支。而自近推恩。尤必先乎同

八旗通志 卷一百三十三
氣。故手足之誼。既篤生前。軫卹之仁。更加歿後。凡以道隆敦本。禮備飭終。典至渥也。惟王朕之介弟。幼授親藩。久沐尊崇。歷沾賜賚。方期奉天倫之樂。承日接之歡。克保修齡。茂膺多祉。何圖春秋猶壯。齒髮未衰。疾疾忽侵。溘焉凋謝。緬維曩昔。感悼良深。特遣官以築幽宮。復勒銘以垂貞碣。嗚呼。音容漸邈。嗟朱郎之長辭。歲月旋移。悵黃壚之永閔。式頒寵命。昭示來茲。不其休歟。

鑲白旗和碩純親王隆禧。

世祖章皇帝子。恭親王常寧弟也。康熙十三年正月。封

和碩純親王。十八年七月薨。諡曰靖。初疾篤時。聖祖仁皇帝親幸王第。立傳醫調治。午時還宮。以王疾奏聞。

太皇太后復

詣王第視之。以王疾篤。復還奏。申時王薨。

聖祖聞訃。驚慟。欲親臨王第。奉

太皇太后諭旨而止。於常祭外加祭一次。爲之造墳立碑。碑文云。

惟稽古懋建懿親。覃敷雍睦。蓋以敦一本。重宗盟也。朕紹嗣丕基。篤敘倫紀。凡屬天潢之派。咸推王室之

八旗通志 卷一百三十三
恩矧任重藩屏。誼殷手足。眷念旣深於存歿。典章豈
靳夫哀榮。惟王乃

皇考世祖章皇帝之子。朕之弟也。質成聰敏。性秉溫恭。
孝友克彰。謙仁適懋。裕含章之雅範。弘樂善之休風。
朕夙重天倫。不吝封爵。賜之茅社。永固河山。方謂同
氣之親。克樹作邦之翰。何期早嬰危疾。遂致長逝。幽
冥。睠昔偕侍

慈幃。同歡別殿。雖爾實凜君臣之分。而朕無間昆弟之
情。往事如存。流光頻易。中心眷戀。何日能忘。是用特
命有司。式循彝憲。務極優崇之數。庶抒惋悼之懷。旣

相土而賜塋。仍易名以旌行。錫之嘉諡曰靖。於戲。寵
沛褒綸。聿表親賢之望。崇開吉兆。尙昭友悌之忱。俾
勒穹碑。永垂奕禩。

鑲白旗和碩恒親王允祺。

聖祖仁皇帝子。

世宗憲皇帝弟也。康熙三十七年三月。封爲多羅貝勒。
四十八年三月。晉封和碩親王。錫號曰恒。雍正
十年閏五月薨。

賜祭葬如典禮。諡曰溫。十二年四月。立碑墓道。碑文云。
朕惟國家展親惇典。立愛必始於因心。賜卹推恩。錫

類宜先於同氣。故眷隆存歿。禮備哀榮。凡以厚本支。示優渥也。惟王銀潢衍派。玉牒傳芳。蚤膺茅土之封。庭闈趨侍。用作屏藩之寄。華萼承輝。秉性和平。茂著含章之望。持躬謙謹。勉期樂善之風。方謂頤養天和。庶遐齡之獲享。詎意遽膺疾疾。乃奄逝之忽聞。軫惻良深。彝章備舉。既易名而致醊。復營葬以勒氓。嗚呼。悵音塵之永隔。念切荆枝。煥綸綍之常新。情深雁序。式頒寵命。昭示來茲。不亦休歟。

鑲白旗和碩淳親王允祐亦

聖祖仁皇帝子。

世宗憲皇帝弟也。康熙三十七年三月。同兄恒親王允祺。俱封爲多羅貝勒。四十八年三月。晉封多羅淳郡王。當是時。

國家承平日久。累洽重熙。兵民樂業。而八旗事務。有漸致廢弛者。五十七年十月。

聖祖諭議政大臣。內大臣等曰。每旗都統。副都統。或有起家微賤。專意狗庇。一應補放官員。併佐領等事。恒有遲至數年。或十年不奏者。或一官病故已久。數年尙仍給俸者。一切事件。漫不稽查。甚是曠廢。正藍旗滿洲都統顏信。前往出兵。其滿洲蒙古漢軍三旗之

事著七阿哥辦理。別旗各相效法。自必發憤勤事也。
七阿哥者。王之行第稱也。是日並

命皇子原封敦郡王允祇。辦理正黃三旗。固山貝子允
禔。辦理正白三旗。各事務。王自受事以後。恪共
厥職。諸務畢舉。頽風靡習。漸至丕變。雍正元年
四月。晉封和碩親王。仍號曰淳。尋以疾解旗務。
八年四月薨。諡曰度。

世宗遣官致祭。九年五月。立碑墓道。文曰。朕惟國家展
親之典。禮莫重於本支。錫類之恩。誼必先於同氣。眷
念既深於存歿。褒崇宜備於哀榮。惟王乃

皇考聖祖仁皇帝之第十五子。朕之弟也。和平秉性。謙
謹持身。昔侍

庭闈。克篤承歡之愛。分封屏翰。益弘樂善之風。朕纘緒
以來。天倫維序。特升位號。晉爵親藩。邸第恬居。守安
貞之素履。園林靜攝。期頤養於遐齡。詎意沉疴。遽聞
溘逝。賜帑金而致賻。頒祭醴以抒悲。用備舉夫彝章。
更摛文於貞石。易名予諡。曰度爲宜。於戲。眷雁序以
含悽。豐碑永勒。荷龍光而增寵。華表方新。垂於奕葉。
不亦休歟。

正紅旗多羅愉郡王允禩。

八旗通志 卷一百三十三
聖祖仁皇帝子。莊親王允祿同母兄也。雍正四年五月。
不封多羅貝勒。八年三月。晉封多羅愉郡王。是時
世宗憲皇帝篤念

皇陵重大。

特命王前往護視。所爲永孝思。重本支者。其意至優且
厚。王體素羸。善病。九年二月薨。諡曰恪。悉按典
禮。

賜予祭葬。十一年十月。爲之造墳立碑。碑文曰。國家建
藩以資屏翰。卹典以重懿親。生荷殊榮。旣剖符而受
冊。歿膺沃澤。更勒石以垂休。聿弘敦本之仁。彌厚飭

終之禮。惟王

聖祖仁皇帝之子。朕之弟也。輝分玉葉。秀擢金枝。賦性
得其和平。素履遵於坦易。朕誕膺寶籙。祇肅

園陵。念茲重地之周防。爰命親藩而護視。用晉封夫王
爵。俾擁衛於

寢宮。庶幾頤養安和。迓純禧而延算。詎意體嬰羸瘠。遂
高謝於塵寰。庀官物以經營。務從優贍。建豐碑而諡
誄。備極哀榮。嗚呼。華萼縈懷。賁丹綸於黃壤。松楸增
色。鐫綠字於青珉。垂諸奕世。不亦休歟。

正藍旗和碩怡親王胤祥。

聖祖仁皇帝第二十二子也。生秉粹質。至性過人。幼偕

諸王侍

聖祖於宮庭。嘗隨行。以穉弱未能前視。

聖祖過。尋履跡伏地嗅之。其孺慕誠切如此。及長。祇服
慈訓。先意承志。靡不周悉。

聖祖鍾愛甚篤。

省方巡幸。恒命扈從。

恩寵優渥。而王謹度循禮。恪慎有加。不立黨援。不邀名
譽。所屬人衆。承奉約束。公私政事。一無擾累。阿

其那妄覲非分。數以詐術誘惑諸王。王獨不爲所動。康熙六十一年十一月。

世宗憲皇帝肇登宸極。總已以臨。稔知王忠孝純摯。特授封怡親王。

命總理事務。當是時。阿其那包藏禍心。隆科多威福自恣。懷挾奸私。圖亂國。是王屹然鎮靜其間。不動聲色。而僉邪顧畏懾服。已隱然有社稷功矣。

世宗念國儲爲民命所關。十二月。

命王領戶部。管理三庫事。王蒞任後。則以國家休養蕃息。民物康阜。成賦歲入旣多。經費浩

繁。簿籍益冗。蠹弊叢集。於是稽覈精密。出納有經。徑竇爲之肅清。府庫歲有餘羨。國用益饒。維時

世宗宵旰勤勞。日以四海蒼生。安富樂壽。物各得所。爲念。撫財用之豐裕。實足以覃敷

闡澤。凡良法美意。可加恩中外者。百務具舉。江南浙江江西浮糧。

聖祖屢欲減除。以廷議異同。未果。王推本

聖祖德意。仰體

世宗弘仁。斟酌奏請。旣

八旗通志 卷一百三十四
上聞乃大嘉悅。

命歲減江南正額。蘇州三十萬兩。松江十五萬兩。浙江之嘉興湖州。江西之南昌。亦次第減除。通計歲減六十一萬兩有餘。直省正供遞行蠲免者亦數百萬。他若興大役以廣惠利。建大工以資捍禦。膏澤普於黎庶。優賚遍於臣工。疊沛

德音。王實親見。

世宗痼瘼弗釋之至意。又適當可以有爲之時。凡聖心所欲施行者。無不矢竭公忠。贊成盛治。京畿不講水利。旱潦無蓄洩之備。雍正三年十二月。

特命總理水利營田事務。王建議興修。疏濬河渠。築堤置閘。區分疆畝。經畫溝塍。復躬親巡視。往返輒經旬月。櫛風沐雨。寒暑靡間。務成萬世永賴之利。期年。杭稻豐稔。民益趨事。甸服以內。數千里之沮洳汙萊。悉成沃壤。江南水道。自河淮而外。多致淺塞。王所屬李淑德。官江南久。熟諳水利。王詢訪形勢。奏請修復。

世宗初欲俟畿輔工竣。

命王親往相度。王亦身任不辭。後因江蘇巡撫之請。王奏以東南水利所關甚重。不可稽緩。乃按圖指

授窮源竟委。因勢利導。工以有成。東南數十州。王雖未身履其地。而宗祿億萬生靈。永受其福矣。兩淮漕政。官吏徵求不已。商以重困。自王總理戶部。浮費大省。商力益裕。輸將以時。準噶爾逆天犯順。窺我邊陲。世宗欲中外久安。救寧疆宇。不得已而用師。王參預密議。洞屬機宜。遠近險易。瞭若指掌。衣資芻粟。馳馬甲兵。計日轉輸。從無稽誤。軍需數以千萬計。一出於庫帑。絲粟不以及民。輓輸數年。而海內未嘗知有用兵之事。由王筦度支而儲蓄充裕。

調度得宜也。王資性精敏。忠勤弗怠。初視部事時。案牘壅滯。累積。王剔除宿習。獎勵曹司。於展限四十日中。舊案數千。悉經理就緒。部務於是。一清。自議政及戶部三庫而外。

特命王察核議覆之事。不可勝計。王事事準協情理。允
愜

聖心。餘若

內殿營造。

舊邸諸務。宮中府中。事無鉅細。一以咨王。王綜理細密。事必躬親。竭力輸誠。精詳周協。既在病中。

而部案紛紜。披閱不倦。王冲懷樂善。扶佑賢良。公忠爲國。與同事諸大臣共矢寅恭。協心籌度。所保薦封疆大吏。多克稱任。遇下仁恕。人樂爲用。部曹賢能者。善待之。含容小過。能改則已。舉劾悉秉大公。未嘗以喜怒有所偏向。至訓飭侍衛。練習禁軍。拔擢材勇。鼓舞成就之。以備

國家之用。孜孜好善之意。無在不然也。至於事關軍國者。知無不言。言無不盡。青海用兵。隆科多以私怨撓軍計。王力言專闡之道。不容掣肘。

世宗用王言。蕩平旋奏。部帑虧空。積有歲年。

命王清釐實數。王以年久數多。典守者衆。請大沛恩澤。槩予保全。乃一一核奏。爲數至二百五十餘萬。又請經理代償。

諭以侵國帑而長子孫。不懲無以示後。未允所請。然數年中。王以庫入之美。代償者已十之八九也。王爲國爲民。濟人利物。因事効忠。日有獻納。而惟恐人知。

聖言或偶一宣布。則惶悚不可名狀。

世宗不欲違王意。不以宣示廷臣。及王身後。

聖意追思弗釋。

諭旨屢頒。於是入告之嘉謨。昔所造膝密陳者。始顯著中外。如寬免雍正三年以前積逋。開復註誤。皆自王發之。至今誦繹。

溫綸。王生平至誠愷惻之意。尚流溢於言辭之表。啓沃之功。爲用弘矣。王承

命訊鞫大獄數十事。詞所連引甚衆。王平心研究。以至誠感格。愚頑以情理折服。虛誕不待加刑。而人自吐實。奏讞條上。一歸平允。蓋王存心忠厚。聽斷公明。實能仰體

聖主如天好生之心。以成國家刑期無刑之治。嘗奏言

曰。聽訟之道。求諸詞色。以察情僞。設誠以待之。據理以折之。未有不得其情者。惟大猾狡獪。不得已而施之。敲撈若槩。用重刑。鍛鍊成獄。三木之下。何求不得。此折獄之未免有冤抑也。

世宗深歎以爲仁人之言。

命天下直省有司。刻木榜置堂署。時時省覽焉。四年七月。

世宗親灑宸翰。書忠敬誠直勤慎廉明八字。賜王。條析王善行。宣諭中外。謂八字皆王實蹟。無分毫過量。至王居心之方正。秉性之和平。待人之寬厚。

遇下之仁惠。八字尚未能備舉。前後屢頒

諭旨。敘述王嘉謨懿行。不下數十萬言。復

諭曰。若有一言失實。則不足以傳信天下後世。非以獎
王。乃厚誣以譏王。朕不忍也。

玉音渙發。朝野傳誦。咸謂

聖主深知王之德。洞悉王之心。故言之親切周詳。而王
德業之崇隆。勲功之表著。實足當之無愧云。

世宗自聞王嬰疾。醫禱備至。每欲

親往臨視。王再三懇辭。旬月間。必力疾入見。以慰

聖念。迨病勢寢劇。恐貽

聖憂。移寓西山養病。至夏四月。始返邸第。

世宗適以禱雨還宮。既得雨。王屢奏請

駕幸圓明園。迨

世宗聞王疾革。既

命駕往視。而王已脫然逝矣。始則不欲以病狀煩

睿念。繼則不欲以永訣傷

聖懷。而於己身之生死。毫無顧慮。非具慧覺之性。去來

自主。而一息不忘忠愛者。其孰能之。王薨。

世宗震悼。輟朝三日。

親行奠醑。特於宮中持素服匝月。自移殯攢廬。月遣官

致祭及葬期已屆。

世宗自製祭章。率宮眷及諸王皇子。以家人禮致奠。攷

周禮大烝之典。以王配食。

廟廷。復憶曩時。與王同事。

皇考聖祖。友愛之情。宛然如昨。凡告

廟典禮。應書名者。仍書王原名。以誌永念。又以古有大

功者。錫之顯諡。復申之美號。以褒揚之。宜以所

賜忠敬誠直勤慎廉明八字。冠之諡法之上。王靡善不

臻。易名之典。宜諡曰賢。以包衆美。廣集廷議。僉

云合禮。

世宗滴淚研硃以書之。中外臣僚。感德慕義者。皆得請

旨叩奠。或遣使致祭。十五省之人民。請建祠崇祀者。遠

近相屬。不謀而同。

特允於奉天直隸江南浙江各建祠宇。以昭崇報。每當

邸第告奠之日。滿漢文武諸臣。皆悲痛失聲。及

啓殯。宗室王公。舉朝紳士。步行哭送。暨道旁者

民走卒。靡不焚香泣拜。婦孺亦灑涕歔歔。王之

懿德美行。入人之深者如此。王操履廉潔謙讓。

一出於中誠。

世宗屢加錫賚。王必懇款固讓。初欲準分封之例。賜以

所應得則辭。繼欲準裕親王例。令支官物六年。則又辭。繼命增加儀仗一倍。則又辭。繼加賜親王俸萬金。辭之不允。則封識所賜而藏之。卜葬之地。瑩域之制。務循儉約。預囑遺言。先是王奉命相地泰寧山。山勢聯絡。有中吉次吉之地。

世宗欲以中吉者賜王。王驚懼色變。固辭。語至悚切。自於涑水擇平善之地以請。及病。恐復以前所欲賜者賜之也。請益力。

世宗不得已從之。王欣喜不自勝。既遣護衛啓土。取小塊吞之曰。若是。則臣心安而子孫蒙福矣。又按

會典成式。繪墳院圖。示王妃暨諸子曰。毋違吾言而越往制。至身後。府中司事者以聞。

世宗鑒王平日退讓誠切。遺言不忍不從。從之。則又於崇德報功之典未稱。

詔廷臣集議。僉謂王賢不世出。宜斟酌舊章。增廣崇廓。特加採納焉。以十年九月葬涑水縣之水東村。從王志也。王蒞事八載。精白一心。光輔大業。

世宗嘗曰。朕實賴王翼贊昇平。王實能佐朕治平天下。咸謂聖主賢臣之相遇。數千百載而一見。今且於本支

八旗通志 卷一百三十四
帝胄之間得之。其盛難概見云。數年來。

特加恩禮於王。及王恭代行禮之日。天氣必融和晴霽。

以夏五月移殯。而清和涼爽。無炎歊之氣。自發引至葬。風恬日朗。徒役歡欣。當大殮時。

世宗將臨視。望東南雲氣。宛若神人聳立層巒。與王惟肖。俄幻爲虎。適當王邸第之上。虎於十二辰中爲寅。王之生年也。王功德隆盛。其大者旣卓卓在人耳目。卽小節亦多人所不能及。

聖祖在熱河。偶遣中使回宮。王迎問起居。墜馬脫脛。強自抑按。仍齊集請

安。不自知其足之傷也。奏牘呈進。

御前者。筆札必致精謹。微至縹囊緹篋。一一經心。王事上之心。毫不敢苟如此。王精於騎射。發必命中。馳驟如飛。嘗從獵。猛虎突出林間。王神色不動。手利刃刺之。見者服其神勇。詩文翰墨。皆工敏清新。而自以未能度越古人。不欲以此自見。亦不自料。僅止中壽。遺稿遂至散失。間有吟咏。曾經

御覽者。吉光片羽。

特珍愛存錄。藏之宮中。嘗

諭大學士張廷玉曰。朕暇日編集詩文。當錄王所作。附

見卷中。以傳永久。至於宗門上乘。深究密諦。明靈了徹。慧悟融通。至末後一著。撒手游行。全體呈露。斯可共證矣。八年五月朔之四日。王薨。年四十九。有五十一年。立碑墓道。

世宗御製碑文云。朕惟國家啓昌隆之運。則誕降名臣。祖宗鍾福慶之貽。則篤生賢胄。粵若師師。虞代稷契。爲帝室之英。濟濟周朝。旦奭是姬。宗之彥。莫不紀諸謨典。頌以聲詩。前蹟可稽。遺編具在。如朕弟怡賢親王。則於古有光者也。王秉乾坤之清淑。萃川嶽之精華。爰自幼年。早徵至行。禁庭奉

誨。循禮度以持躬。內殿承

歡。篤孝思於繞膝。實超出於同氣。久默識於中懷。是以

纘紹之初。慎選親賢之寄。特加恩命。晉授王封。正在

亮陰。俾膺總理。當良奸之雜處。以鎮靜服羣情。遇綱

紀之待釐。以精明襄萬務。誠勞旣著。眷倚逾殷。綜中

外之訏謨。司兵農之大計。而王恪勤匪懈。兢勵彌深。

體朕心爲己心。視國事如家事。詳核度支之積竇。府

藏充盈。請蠲吳越之浮糧。閭閻康阜。興田功於畿內。

秔稻連疇。籌水利於江南。河渠順軌。至若邊形指掌。

瞭大勢於川原。武略在胸。贊成謀於幃幄。壯戎容於

鴈磧。組練鮮明。裕軍實於龍沙。驍騶騰躍。蒼黔恬樂。罔聞徵發之頒。朝省安閒。莫見運籌之迹。是其潛思默算。備竭精誠。故能應變投機。不形聲色者矣。扶持正直。公道於以昭彰。薦達猷為。人材由茲奮起。度惟謙挹。同事務協於和衷。量本寬弘。曹官胥歸於涵茹。領周廬之環衛。訓練維勤。定宮府之規模。施為悉當。凡關於民生吏治。知無不言。曾經其熟計深圖。行皆有效。祇慎而不宣於眾。退讓而恐居其名。皆中禁之密陳。豈外廷之能曉。心迹則青天白日。衾影無慚。節操則瑩玉清冰。垢塵不染。研幾窮理。得聖經賢傳之

精微。輔世寧民。具帝佐王臣之蘊負。道光竹帛。恢平章調燮之勲。瑞叶星雲。樹喜起明良之範。朕實賴王治安寰寓。王實為朕翊贊昇平。既歷八年。有如一曰。斯乃

上天降佑。

列祖垂麻。賚良弼於本支。作盛時之梁棟。於

皇考為孝子。於朕躬為純臣。自昔罕聞。在今幸覩。惠慈之性。宜其克享遐年。豈弟之恩。足以迓承繁祉。人情胥願。天數難齊。詎盡瘁以忘軀。遂抱疴之纏體。禱

神祇而靡應。商醫藥而弗瘳。王忠愛之忱。始終一致。沉

八旗通志卷一百三十四
綿之候。遷避而勿敢上聞。危篤之期。溘逝而慮傷永訣。朕將臨視。王已飄昇。望幻影於雲中。靈奇示象。蛻色身於塵界。慧覺超凡。生有由來。理當可信。王幽明感德。遠近歸仁。錫命每申。則日晴紫陌。祖筵方徹。則風藹青阡。虔叩總幃。動舉朝之痛憶。競隨素紼。溢長路之悲號。嘗賜標題。畧傳梗槩。忠敬而兼之誠。直勤慎而益以廉明。禮重易名。約一言而該美善。義隆加謚。冠八字以示寵褒。朕親奠郊垆。頻紆車駕。時陳牲醴。每遣臣僚。敦儉素之風。塋兆本由於自擇。議推崇之典。經費優給於官供。吉宅旣安。豐碑宜勒。於戲。念

股肱之誼重。雕刻金鏞。倦手足之情深。鋪揚玉牒。功高德茂。享亘古之鴻聲。生榮死哀。備生人之全福。將使斯文炳煥。偕星曜以流輝。貞石嵯峨。與峯巒而永峙。云爾。王子五人。弘昌。弘暉。弘瞻。弘曉。弘暉初冊爲世子。與弘瞻皆早歿。弘暉之歿也。其所聘傅察氏。堅志守節。詳見列女傳。弘昌封貝子。弘皎封寧郡王。弘曉襲封怡親王。俱醇謹能守王遺訓焉。

書